

COMUNICATO n. 3329 del 27/11/2024

Traduzione in mòcheno

De nainontdraiskeste Konferenz van Sprochminderhaitn vourgahòlten van asesor Marchiori

[Mòcheno] De hòt se gahòlten en mita vria af de 20 van òlderhaileng en Sol Trentin, kan sitz va Piazza Dante de nainontdraiskeste Konferenz van Sprochminderhaitn, as vourgahòlten kemmen ist van provinzalasesor en de politik ver en haus, de pahalter, der demanio ont s unterstitzn van kennen de Autonomi Simone Marchiori, zòmm pet de viareren van Dinst ver de Sprochmonderhaitn ont de ausbendegen netzn Elisabetta Sovilla. Va vèrr sai' gaben der regionalasesor Luca Guglielmi aa zòmm pet de vourstea'ner van ladiner, bersntoler ont zimber sprochminderhaitngamoa'schòftn, zbischn de beiln de lokal amministratorn, de toalnemmer van Amministrazionrotn van Kulturinstitutn ont va de Autoritet ver de sprochminderhaitn.

Marchiori hòt gèltsgott tsòk ver de lait as gaben sai' ver en sai' paitrog ver en schitz ont unterstitz van sprochminderhaitn ont hòt gadenkt der trèff van Provinzalrot va gestern, bail en beil hòt der asesor, pet òrbet gem van president Fugatti, iber de rèchtn van minderhaitn klòfft hòt. "De doi konferenz derstellt an envirgea'" der hòt tsòk, ont hòt gadenkt de sòchen gatu' va de Provinzaljunta ver de platz bou as de sprochminderhaitn lem ont as am mearestn de problem van pèrgplatz lem.

Men hòt klòfft van punkt van petrèff, as hòt gahòp za tea' pet en dinst za gem aus de osterraicher kanaln Orf1 ont Orf Sport en de platz van sprochminderhaitn, ober avn gònze provinzallònt aa, ver en beil as men geat keing a verpessering, ont as kierzlech ausgea' miaset, asou as men sa sechen mu en platz as pet en earste vourtschbinn nèt galuckt gaben sai', abia zan paispil de Lenzer en Bersntol.

"S ist a moglechkait ver òlla de lait va de Provinz, as en doi vurm de moglechkait hòt za hearn a sprochen as glaim ist ont ver de sprochminderhaitn ist a moglechkait za sechen televisionprogram en de sprochen as mear glaim ist: a bichtega naikait en de beil de Provinz glap", hòt nou der Marchiori tsòk.

De Sovilla sèlber hòt unterstrichen as ist "An projekt as zoacht an bichtegen tritt ver za verglaimern se en de sprochen, men mu song va mearersprochen ont van an vurm en beil as de minderhaitn van inser lònt an òrbet va earste plòtz hom", ont hòt gadenkt as men heahern bart de technische qualitet van program va Orf. Der trèff hòt zòmmklaup s belln envitrong de nain technise ont kontrakt elementn ont der enteress ver za baitern s dinst en de zboa jarder as kemmen.

Zan leistn van òrbetn s ist klòfft kemmen van nai trèff va de Konferenz as se hòlten bart en genner 2025, bail en beil as men klòffen bart va abia as men bart toaln s Provinzalgèlt ver de sprochminderhaitn ont de politik ver za òrbetn ver za schitzn ont unterstitzn de minderhaitn.

Ibersetz gamòcht van Sprochtirl va de Tolgamoa'schòft Hoa Valzegu' ont Bersntol

(cdt)